

չունին այն իմաստը, որ տրամադիր է տալ Պ. Մանանդեան: Եւ ինչ որ զարմանալի է, բերում է Փարպեցուց մի վկայութիւն, եւ միամտօրէն կարծում է որ այդ հաստատում է իր տեսութիւնը: Պարսից թագաւորը հրամայում է Աբրահամ եւ Պորէն երէցներին երթալ Ասորեստան, որ այնտեղ «մշակութիւն արասցեն ընդ արքունի մշական եւ ի հարկի կայցեն մինչեւ ցվախճանս իւրեանց»: Թագաւորի պատուէրը կատարում է եւ երկու երէցների աւանջները կտրում են եւ զրկում Ասորեստան «կալ անդ նոցա ի հարկի եւ առնել մշակութիւն»:

Պորէնը մեռնում է աքսորում, իսկ Աբրահամը տեղացի քրիստոնեաների երաշխաւորութեամբ «որք զտունս իւրեանց եւ զարարս փոխանակ ընդ հարկի նորա գրեցին յարքունիս ցվախճանս նորա, եւ կատարեցին զկարգեալսն անվեհեր յաղագս նորա», արձակւում է եւ դալիս Հայաստան:

Պ. Մանանդեանի ըմբռնումով ի հարկի կալ նշանակում է հարկ տալ: Ասել է թէ հայ աքսորական քահանաները ոչ միայն արքունի մշակութիւն պիտի անէին, այլ եւ պարտաւոր էին հարկ տալ եւ ահա այդ հարկաւորութիւնից նրանց ազատելու համար Ասորեստանի հաւատացեալները գրաւ են դնում կամ երաշխիք առաջարկում իրենց զոյքը:

Արդոյ բանասէրը այսպէս մտածելով, մեղանչում է ոչ միայն տառի, այլ եւ իմաստի դէմ: Արդարեւ, ով է տեսել, որ տաժանակիր աշխատանքի դատապարտուած աքսորականները դեռ հարկ էլ տան եւ ի՞նչ միջոցներից: Փարպեցին աւելի զգաստ է քան խորհում է Պ. Մանանդեան եւ սիրահար չէ անհեթեթութեանց: Նա պատմում է, որ աքսորեալ խեղճ երէցները ապրուստի միջոց չունէին եւ նրանց պիտոյքները հոգում էին տեղացի քրիստոնեաները յօժարակամ ընծայարեութեամբ: Ուրեմն ո՞րտեղից պիտի վճարէին այդ թշուառականները պետական հարկ, եւ ինչո՞ւ պիտի վճարէին, քանի որ հոգեւորական լինելով չէին պատկանում հարկատու դասին:

Պարզ է որ խօսքը հարկի մասին չէ եւ չէ կարող լինել:

«Ի հարկի կալ», տեսանք, որ Ս. Գրքում

նշանակում է ծառայել, մարմնաւոր աշխատանք կատարել, համաձայն յոյն *ergomai*: Պատմագիրն ինքը մեկնում է՝ «առնել մշակութիւն արքունի»: Եւ այս է իսկական իմաստը ի հարկի կացութեան: Եղեչէն նոյն պատմութիւնն անելիս ասում է պարզօրէն՝ «Կտրեաց զնոցա ունչս եւ աւանջս եւ ետ տանել յԱսորեստան զի կայցեն ի մշակութեան արժունի»: Դարձեալ կրկնում է դահճապետի բերանով՝ «եղեւ հրամանս պատուհասիդ ձերոյ եւ ի վերայ դորին պատուհասի՝ երթալ ձեզ յԱսորեստան եւ լինել ձեզ մշակ յարքունիս»: Մի ուրիշ անգամ Եղեչէն նրանց պատիժը կոչում է «արքունի պատուհաս»:

Արտաքին աղբիւրներից յայտնի է, թէ ինչ էր արքունի մշակութիւնը: Այն ինչ որ այժմ կոչւում է հասարակաց կամ հանրօգուտ աշխատանքներ, իսկ մեր ժողովուրդն ասում է՝ թագաւորական բեկար: Ճանապարհներ շինել եւ պահպանել, ջրանցքներ բանալ եւ մաքրել, հեղեղների դէմ ամբարտակներ կանգնել, ուղեւորների համար օթեւաններ, կարուստաբաններ, կառուցանել, կամուրջներ ձգել, պետական եւ արքունի շէնքերի վերայ աշխատել, գուցէ եւ արքունի կալուածներում, նաեւ հանքեր մշակել—ահա մի շարք աշխատանքներ, որ կատարում էին արքունի կոչուած մշակների ձեռքով: Նրանք իրենց պետերն ունէին գործի ղեկավարները, որ կոչւում էին *karigbed*, աւելին էին ձեռք լինելու է *karikpet*. Ճիշդ այն գործավարներն են, մարդահարկերի վերայ նշանակուած, որ յիշում է Ղեւոնդ երէցը իր վերեւ յիշածս խօսքերում:

Ահա այն մշակները, որոնց հետ պիտի լծուէին մարմնաւոր տաժանքի եւ մեր երէցները: Պատմագիրը հաւատացնում է որ տեղացի քրիստոնեաները իրենց երաշխաւորութեամբ ազատ կացուցին Աբրահամին ծանր պատուհասից:

Պ. Մանանդեանը կարծում է որ «համեմատելիք այն հարկերի համար էր, որ նրանից ստացուելու էր մինչեւ նրա վախճանը»: Ոչ, Փարպեցին ուրիշ բան է ասում: Երաշխաւորութեան գլխաւոր կէտը զանց է անում Պ. Մանանդեան, որ է «եւ կատարեցին զկարգեալսն անվեհեր յաղագս նորա»: Քրիստոնեաները,